



## ANEXO I

### Asunto: información da situación xeral da ANPA Valle Inclán

#### EXPOSICIÓN DE MOTIVOS

A actividade da ANPA afecta á totalidade das familias do centro escolar e ó resto da comunidade educativa. Dado que os servizos da ANPA Valle Inclán están incluídos na PXA do CEIP, están aprobados polo Consello Escolar e deben axustarse á normativa do centro, a xunta directiva en representación das familias socias informou da situación actual da ANPA ó Consello Escolar, e a través deste escrito queremos facer partícipes tamén ás familias socias.

Dende que os actuais membros da xunta directiva da ANPA Valle Inclán ocupamos os cargos como representantes das familias socias, o 25 de xuño de 2021, e coa intención de actualizar, dar legalidade e transparencia a todos os servizos e accións que desempeña a ANPA neste colexio público, comezamos unha revisión exhaustiva dos libros, dos contratos, da loxística e dos métodos de administración da asociación.

No centro existe unha relación de colaboración entre a ANPA Valle Inclán e a Asociación Deportiva Cultural (ADC) As Mariñas dende o 2010, ano da formación da ADC por iniciativa da ANPA, coa intención de que o alumnado do CEIP continuase realizando deporte unha vez que finalizara a etapa escolar e pasase ó instituto (segundo acta de asemblea 11/10/10).

Así pois, trátase dunha entidade administrativa completamente independente da ANPA, cos seus propios estatutos. ADC As Mariñas é unha asociación sen ánimo de lucro. O actual presidente da ADC foi membro da propia xunta directiva da ANPA Valle Inclán durante 13 anos. Foi durante ese período no que comezou a relación de colaboración entre a ANPA e a ADC.

Comprobamos a existencia dunha situación herdada na xestión actual da ANPA dende hai máis de 12 anos: todos os servizos para o alumnado matriculado no centro escolar fora do horario lectivo, “Mañanceiros”, “Comedor Escolar”, “Actividades Extraescolares” e “Coordinación da ANPA” eran xestionados única e exclusivamente pola ADC. Incluso ofertaba os “Campamentos de verán” para o alumnado, xa rematado o curso escolar, e as excursións de fin de curso de 6º EP.

Nos últimos meses detectamos determinadas incongruencias na xestión da ANPA que nos levaron a consultar con expertos e solicitar asesoramento. Como actuais administradores da ANPA é a nosa obriga defender os intereses da asociación e garantir que as actividades que organizamos se axustan completamente á legalidade.

Entrementres se está a reorganizar esta situación, e para evitar danos ás familias usuarias, ofreceuse á ADC subscribir un contrato con duración dende o 8 de setembro ata o 22 de decembro de 2022, para os servizos de “Monitorado de Comedor” e “Monitorado de Actividades Extraescolares”, coas **cláusulas e condicións** que os nosos asesores consideran indispensables que se inclúan **para que cumpramos coa normativa laboral, fiscal e en materia de protección de datos.**



A través deste informe, queremos deixar constancia das incidencias detectadas nos distintos servizos que se desenrolan a través da ANPA no centro escolar dende que iniciamos o noso traballo como xunta directiva:

#### 1. MONITORADO

- Producíronse **incidentes durante a vixilancia do alumnado por parte do monitorado que proporciona ADC As Mariñas**. Moitos destes incidentes foron coñecidos *a posteriori* pola xunta directiva, que non é informada cando corresponde por parte da ADC. A gravidade dalgún deles fannos dubidar de que a vixilancia sexa a correcta.

- Temos constancia de que o monitorado de ADC emprega o **móbil** durante os servizos para poñer **música ou mostrar aplicacións que consideramos non axeitadas ós rangos de idade** dos menores. Pese ós reiterados avisos á coordinación de monitorado, faise caso omiso das nosas premisas para garantir un servizo de calidade.

No presente mes, a dirección do CEIP enviou un escrito para poñer en coñecemento da xunta directiva da ANPA as **queixas reiteradas dos mestres e mestras polo emprego indebido dos móbiles por parte do monitorado** de comedor e extraescolares, indicando que nun centro educativo non se debe dar este tipo de comportamentos. A xunta directiva advertiu de novo á ADC As Mariñas de que debe rematar definitivamente este uso irresponsable dos teléfonos cos menores.

- En numerosas ocasións a xunta directiva **solicitou á ADC que presentase a documentación pertinente para confirmar a idoneidade do monitorado (certificado negativo de antecedentes en delitos sexuais, alta na Seguridade Social, formación...)** recibindo negativas por parte do presidente da ADC alegando temas de protección de datos.

Nos actuais contratos subscritos coa ADC para este trimestre, incluímos **cláusulas para que esa documentación sexa de obrigada presentación**. O 30 de setembro presentáronse os certificados solicitados e o 18 de outubro coñecemos o nome, apelidos e formación das persoas que desempeñan as labores de monitorado no noso centro a través da ADC.

#### 2. MAÑANCEIROS:

- **Inexistencia de contratos vinculantes** entre ADC As Mariñas e a ANPA Valle Inclán para prestar o servizo.

O curso pasado esta situación legalizouse e contratouse a unha empresa especializada, Jardanay, que dende entón xestiona de forma integral ese servizo (altas, baixas, cobros e avisos son directos entre a empresa e as familias).

#### 3. CAMPAMENTOS DE VERÁN

- **Non temos constancia da existencia dun contrato de prestación de servizos** subscrito entre a ANPA e a ADC para o desenvolvemento desta actividade durante os anos nos que ADC As Mariñas desenrolou no centro os seus campamentos de verán.

- No verán do ano 2022 seleccionouse unha nova empresa especializada para levar a cabo esta actividade e regularizouse a vinculación contractual entre a empresa



prestadora do servizo e a ANPA. No mesmo momento en que outra empresa foi seleccionada para desenrolar o servizo, houbo un **envío masivo de correos electrónicos ás familias socias da ANPA dende a conta de correo electrónico de ADC As Mariñas**, a pesar de que no contrato de prestación de servizos firmado coa citada asociación **prohibíase expresamente o uso dos datos persoais dos socios da ANPA para fines distintos dos estipulados no contrato**, o que supón un incumprimento contractual.

Neses correos, ademais, **poñíase en dúbida a correcta xestión da asociación por parte desta xunta directiva**, permitíndose interpretar os acordos da asemblea de socios, algo que corresponde facer, única e soberanamente, á xunta directiva.

#### 4. COORDINACIÓN ADMINISTRATIVA DA ANPA

- Nos últimos meses as queixas das familias e as notificacións de **incidencias que teñen que ver coas actividades da ADC non son reportadas á xunta directiva da ANPA**, que dese xeito descoñece a situación real dos servizos. Nesta mesma forma de proceder, as únicas queixas que chegan por esta vía en relación ó comedor escolar son as que teñen que ver coa calidade dos servizos prestados pola empresa Jardanay.

- **As actividades promovidas pola ANPA que non teñan que ver coa contratación directa de ADC As Mariñas son ignoradas** pola coordinación e na nosa opinión non son debidamente atendidas.

A coordinación debería encargarse de administrar e supervisar todos os servizos que ofrece esta ANPA, indistintamente da entidade que presta os mesmos. Entendemos que existe un conflito de intereses que pode causar este comportamento.

#### 5. ACTIVIDADES EXTRAESCOLARES

Dende comezos do verán, o Real Club de Tennis Coruña (RCTC) púxose en contacto con todas as ANPAS dos colexios de Oleiros para ofertar unha actividade totalmente de balde para o alumnado, un Campus Escolar de tenis, con fondos da Xunta de Galicia.

O contacto que lle proporcionaron ó RCTC para contactar coa ANPA Valle Inclán foi o do presidente da ADC As Mariñas, descoñecemos a orixe desa confusión.

O que si comprobamos meses despois foi que o RCTC tentou en repetidas ocasións ofertar a actividade do Campus Tennis gratuíta no noso colexio, sempre a través do responsable de ADC, quen non só non emendou a confusión senón que non proporcionou os datos de contacto correctos da ANPA. Según nos manifesta o RCTC a ADC limitouse a dar largas durante varios meses, para finalmente, rexeitar en nome da ANPA a oferta da actividade gratuíta para o CEIP Valle Inclán comentando que a ANPA non estaba interesada. Sen embargo, a ANPA non era coñecedora deste tema.

Casualmente, durante o deseño da programación das extraescolares, durante o verán, a xunta directiva da ANPA contactou co clube de tenis para interesarse en promover un convenio de colaboración para poder ofertar tenis nas extraescolares. Foi nese momento no que fomos conscientes da existencia do Campus Tennis, e de

que estiveramos a punto de perder a oportunidade de desfrutar desa actividade, pois o RCTC xa obtivera unha resposta negativa por parte do presidente de ADC.

A pesar deste impedimento, a actividade puido saír adiante gracias ó traballo da xunta directiva da ANPA que conseguiu organizar todo para ofertar en tempo e forma o Campus a todas as familias socias.

#### 5. COMEDOR ESCOLAR

Actualmente o comedor escolar é xestionado a través de dúas entidades contratadas pola ANPA para ese fin: Jardanay, unha empresa coruñesa que presta un servizo de cociña transportada, e a ADC As Mariñas, que proporciona o equipo de monitorado.

-Solicitouse presuposto para a **xestión integral do servizo á empresa especializada Jardanay** (tal e como xa é xestionado “Mañanceiros”). Este **presuposto é substancialmente máis barato** que o que factura por este servizo ADC As Mariñas.

Este modelo de xestión ofrecería un servizo máis eficaz e cómodo para as familias e eliminaría unha grande carga administrativa para a asociación. Ademais se profesionalizaría o servizo, xa que os monitores aportados por Jardanay reciben formación especializada.

Non obstante, antes de cada asemblea onde se someteu a votación a opción de xestión integral, houbo unha **campaña previa feita polos traballadores de ADC As Mariñas, que afectou aos menores e ás súas familias, ós que se lle transmitiu a falsa información de que no caso de cambiar de empresa todo o monitorado sería despedido.**

#### 5. ASEMBLEA XERAL DE SOCIOS

O curso pasado, antes das asembleas nas que se sometían a votación as empresas que desempeñarían os distintos servizos, presentando presuposto de tres entidades distintas, a xunta directiva sufriu unha **campaña por parte de ADC As Mariñas.**

O presidente de ADC As Mariñas chegou a celebrar **reunións a porta pechada** cos seus traballadores (os monitores do colexio) **empregando o local social da ANPA no centro escolar sen permiso** e sen permitir estar presente a algún membro da xunta directiva. Descoñecemos a finalidade desas reunións.

Somos conscientes de que durante as semanas seguintes, no período previo ás asembleas, eses monitores difundiron entre as familias a idea de que se na votación non era escollida ADC As Mariñas perderían o seu traballo. Algo totalmente incerto, dado que o Estatuto dos Traballadores garante a continuidade cando se cambia de empresa se eses traballadores están debidamente contratados.

Nesa **campaña de desinformación e manipulación** das familias, ADC As Mariñas chegou a **entregar ós menores agasallos sen o permiso** da ANPA nin do CEIP, como despedida no caso de que na asemblea a votación non fose a favor da ADC, chegándose a escoitar frases coma “un regalito porque a lo mejor el año que viene nos os vemos, si el ANPA nos echa”.

Chegamos a ser testemuñas, na entrada das asembleas, da presenza de **menores do centro pedindo o voto** “para que el ANPA no eche a los monitores”.



Houbo incluso **chamadas telefónicas** entre o presidente da ADC e membros da xunta directiva tratando de impoñer a súa forma de xestión.

#### 6. ESTADO DE CONTAS

- Ó inicio da nosa andadura, ó revisar o libro de contas detectouse un apunte contable moi alto en relación co dominio da web e as liñas telefónicas da ANPA. Investigouse que facturas estaban detrás deste gasto.

Así, atopáronse dous cargos na conta bancaria por dúas liñas telefónicas diferentes, cando a ANPA utilizaba unha única liña de teléfono móbil. Comprobamos que o cargo da outra **liña telefónica fixa e o "router" asociado estaban a nome do presidente da ADC As Mariñas, no seu domicilio, dende o ano 2.019.**

Sen embargo **as facturas desa liña pasábanse a unha das contas bancarias das que a ANPA é titular.**

Requiriuse ó presidente de ADC para que abonase o importe das facturas que foran pagadas pola ANPA entre os anos 2.019 e 2.021 e esta situación foi regularizada.

#### 7. INCIDENCIAS COA CORRESPONDENCIA POSTAL DE ADC AS MARIÑAS

O Equipo Directivo do CEIP Valle Inclán remitiu recentemente un escrito á directiva da ANPA informando de que estanse a recibir cartas certificadas con ADC As Mariñas como destinatario e coa dirección postal do propio colexio. Asemade, comunicou que isto leva tempo sucedendo e que non se volverá a recoller esa correspondencia. Solicitamos unha explicación sobre porque ADC As Mariñas, entidade totalmente independente da ANPA e do CEIP, emprega a dirección postal dun centro escolar público dependente da Xunta. A súa resposta foi que as explicacións serán dadas unicamente á dirección do CEIP.

#### **POR TODO O EXPOSTO, CONSIDERAMOS**

Dende que a xunta directiva comezou a revisar as inercias de administración da ANPA Valle Inclán dos últimos anos está sendo obxecto de moitas presións por parte da ADC As Mariñas, que dificultan moito a nosa labor voluntaria.

Non podemos permitir que a devandita asociación faga as actividades sen cumprir cos requisitos legais de obrigado cumprimento.

Non podemos permitir que se facturen os servizos con prezos por enriba do mercado.

Non podemos permitir que a ADC tome decisións en nome da ANPA.

Debemos trazar unha liña divisoria entre as competencias da ANPA no centro escolar e os servizos prestados pola ADC (polos cales recibe unha contraprestación económica) e que desempeñou certas funcións sen base contractual para elo.

A insistente forma de proceder da ADC para impoñer a súa xestión e prezos, sen priorizar a calidade dos servizos, estanos levando á unha situación moi delicada e insostible para a ANPA. Ante os feitos expostos, estase a producir unha perda de confianza na ADC.

A xunta directiva é única responsable da xestión da ANPA, e o noso obxectivo prioritario é dar un servizo de calidade, transparente, legal e profesional ás familias e mellorar a calidade de ensino e dos servizos para toda a comunidade educativa.



Está clara a importancia do traballo que a ANPA desenrola no centro e o seu papel como facilitadora da conciliación familiar e laboral das familias. A existencia da ANPA depende da vontade dalgunhas familias que ofrecemos o noso traballo voluntario e desinteresado.

Ante os feitos relatados, sentímonos desprotexidas, cunha grande responsabilidade e sometidas a moitísima presión innecesaria. Para nós é clave sentir o apoio non só das familias, senón tamén do resto dos membros da comunidade educativa. Todos debemos traballar na mesma dirección.

En Perillo, a 27 de novembro de 2022  
XUNTA DIRECTIVA ANPA VALLE INCLÁN